

四庫全書

史部

欽定四庫全書

前漢紀卷九

漢 荀悅 撰

孝景

皇帝丁未即位秋九月有星孛于西方其本值尾箕末至牽牛及天漢十六日不見

元年冬十月詔曰蓋聞古者祖有功而宗有德孝文皇帝德厚侔於天地利澤施四海而廟樂不稱朕甚懼焉

其奏昭德四時之舞丞相嘉等奏尊孝文廟為太宗奏
昭德四時之舞令郡國皆立太宗廟四時舞孝文所作
以明天下之安和夏四月御史大夫陶青使匈奴結和
親五月令民田收半租太中大夫任城周仁為郎中令
仁為人陰重不泄衣敝不飾甚見親信上自幸其家者
再賞賜甚厚仁常固讓諸侯羣臣贈遺無所受

二年冬十二月有星孛于西南令天下男子年二十始
賦春三月立皇子德為河間王闕為臨江王餘為淮陽

王非為汝南王彭祖為廣川王發為長沙王夏四月壬午太皇太后崩六月丞相申屠嘉薨時內史鼂錯貴幸穿太上皇廟墻垣為舍門嘉奏請誅錯自歸上上曰此非真廟垣又我使為之錯無罪嘉曰悔不先誅錯為所賣遂歐血而死嘉為人廉直初鄧通侍文帝有慢嘉曰朝廷之禮不可不肅文帝曰君勿言吾私之罷朝嘉檄召通通恐入言文帝帝曰若往吾今召若通至嘉責之曰朝廷者乃高皇帝之朝廷通小臣乃敢戲殿上大不

敬當斬通頓首出血不赦文帝使使持節召通謝丞相
曰此吾弄臣也君釋之通乃得免秋八月丁巳御史大
夫陶青為丞相左內史鼂錯為御史大夫封蕭何曾
孫嘉為列侯先是嘉兄則有罪失侯梁王來朝上與譙
飲太后前上從容言萬歲之後傳於王詹事實嬰者太
后從兄子進曰天下者高帝之天下父子相傳漢之法
矣陛下何得傳梁王太后怒絕嬰屬籍遂免官匈奴和親
三年冬十月膠東下密人年七十餘生角角有毛本志

曰老人吳王象也年七十七國象也人不當生角猶諸侯不當舉兵向京師七國將反之應也十有一月白項鳥與黑項鳥共鬪楚國苦縣白項鳥不勝墮泗水中死者過半十有二月吳城門自傾大船自覆本志以為金沘木也吳地以船為家天戒若曰國家將傾覆矣春正月淮陽王正殿災吳王濞膠西王卬楚王戊趙王遂濟南王辟光淄川王賢膠東王熊渠皆謀反初上為太子時吳王太子入朝與上博爭道無禮於上上以博局擲

之而死送喪至吳吳王怒曰天下一家何必來葬復遣還長安後稱疾不朝陰懷逆謀時齊人鄒陽淮陰人枚乘皆遊吳乘諫曰夫以一縷之絲系千鈞之重上懸無極之高下垂不測之深雖至愚之人猶知其絕矣以君所為危於累卵難於上天若變所為易於反掌安於太山今欲極天命之壽弊無窮之樂終萬乘之權不出反掌之易以居太山之安而欲乘累卵之危走上天之難此愚臣之所大惑也陽亦數諫吳王不聽乘陽皆去遊

梁鼂錯說上曰吳王驕恣陰有逆謀今削之亦反不削亦反削之其反疾而禍小不削則其反遲而禍大於是楚趙有罪先削吳王恐禍及身已為使者自見膠西王合謀發使約諸侯七國同謀南使南越北連匈奴吳王下令國中曰寡人年六十二身自將小兒年十四亦為士卒先諸君年上與寡人同下與小兒等皆發移書郡國曰漢賊臣鼂錯侵奪諸侯地陛下多疾志逸不能省察欲舉兵誅之敝國雖小精兵可得五十萬人南越分

其卒半以隨寡人寡人又得三十萬趙王固與胡王有約寡人節衣食積金錢修甲兵聚糧食夜以繼日至今三十餘年寡人金錢布天下諸侯王日用之不能盡今人有能得大將者賜金五千斤封邑萬戶以城邑降者封萬戶若率萬人降者如大將軍科他皆以差受爵吳楚反書上聞鼂錯議欲令上自將兵身留居守計未定錯素與袁盎有郤錯言盎前為吳相宜知王謀而蔽匿不言使至於是欲請治盎計未定盎密聞之乃夜告竇

嬰因求見上言吳所以反故錯方與上調兵食上問盜
盜對曰吳王無能為也上曰吳王即山鑄錢煮海為鹽
誘天下豪傑白頭舉事何以言吳無能為也盜對曰吳
王銅鹽之利則有之安得豪傑而誘之吳王若得豪傑
亦將轉而為義則不反矣吳之所誘者無賴子弟亡命
鑄錢姦人故相誘以反錯曰盜筴之善上問計將安出
盜曰願屏左右上屏人獨錯在盜曰臣所言人臣不得
知乃屏錯錯趨避東廂意甚恨盜對曰吳楚言鼂錯擅

削諸侯地故先共誅錯復其故地而罷兵今計獨有斬錯發使使吳楚七國赦其罪復其故地則兵可無血刃而俱罷上默然良久遂從其計斬錯東市拜盎為太常使使至吳吳王曰吾欲為東帝矣即劫盎使為將盎不聽使一都尉以五百人圍守盎欲殺之初盎為吳相時從吏私盜姦盜侍婢吏懼走而盎馳自追之遂以侍婢賜之及見拘從吏適在守盎拔為司馬乃夜與盎俱亡而還枚乘獻書諫吳王曰昔秦西舉胡戎之難北備榆

中之關南距羌笮之塞東當六國之鋒六國乘信陵之
藉明蘇秦之要厲荆軻之威并力一心以備秦然卒滅
六國而并天下何則地利不同而民輕重不等也今漢
據全秦之地兼六國之衆修戎狄之義而南朝羌笮此
其地與秦地相什而民相百大王所明知也今夫佞諛
之臣不論骨肉之義民之輕重國之大小以為吳禍此
臣所以為大王患也夫舉吳兵以資於漢譬猶蠅蚋之
附羣牛腐肉之齒利劒鋒刃始接則無事矣天下聞吳

率失職諸侯責先帝之遺詔今漢親誅其三公以謝前過是大王之威加於天下而功越於湯武矣夫吳有諸侯之位而實富於天子有隱匿之名而居過於中國此臣之所為大王樂也今大王還兵疾歸可十得其半不然漢知吳有吞天下之心赫然加怒羽林黃頭循江而下襲大王之都竄東海之地絕吳餉道梁王飾車騎習戰射積粟固守以逼滎陽待吳之饑大王雖欲反都亦不得已今大王去千里之國而制於十里之內張韓將

北地弓高宿左右兵不得下壁軍不得休息臣竊哀之
吳王不聽二月辛巳朔日有食之邯鄲有狗與豕交本
志以為趙王悖亂失類外交匈奴似犬豕之行也絳侯
周勃子亞夫為太尉將三十六軍擊吳楚竇嬰為大將
軍賜金五十斤嬰陳金廡下軍吏過輒令取為用金無
入家者嬰屯兵滎陽曲周侯酈寄擊趙將軍樂布擊齊
太尉至霸上趙涉以布衣遮道說太尉曰吳楚聞將軍
出兵必置伏兵姦人於崱澠阨塞之間且兵事尚神密

將軍何不從此右關去趣藍田出武關指洛陽不過差
一二日直入武庫擊枹鳴鼓諸侯聞之以將軍從天降
而下也亞夫從之已而使之搜崎澠間果得吳伏兵乃
請涉為護軍亞夫既至洛陽見劇孟喜曰七國舉事而
不用孟吾知其無能為也孟者洛陽人為任俠行似魯
朱家亞夫問故父客鄧都尉計策安出對曰吳楚兵銳
甚難與爭鋒莫若引兵東北壁昌邑以梁委吳吳必盡
銳攻之將軍淡溝高壘勿與戰使輕兵絕淮泗之口斷

吳餉道使吳梁相弊而糧食竭以全制其虛吳必破矣
從之吳攻梁梁王急請救亞夫亞夫不往梁王上書請
救上詔亞夫救梁王亞夫不奉詔堅壁昌邑而使其淮
泗口兵絕吳餉道楚乏糧挑戰亞夫終不出夜軍中驚
而內相攻擊擾亂至於帳下亞夫堅卧不起有頃乃自
定矣吳夜攻營壁東南亞夫使為備西北吳精兵果奔
西北不得入吳楚既饑乏乃引兵去亞夫出精兵追擊
大破之是時弓高侯韓頽當為將軍擊吳楚功冠諸侯

吳王棄軍與壯軍數千人亡走江南保丹徒遂奔越三月吳楚平越人斬吳王頭以降吳之圍梁也梁將張羽韓安國距之羽能力戰安國能持重故吳兵不能進楚王戊軍大敗自殺戊初與吳通謀大中大夫申公白公諫不聽胥靡之衣赭衣杵臼舂於市初魯有穆生及申公白公皆與元王俱學詩於浮丘伯浮丘伯者荀卿門人也元王常禮此三人穆生不飲酒常為設醴及王戊一朝失不設醴穆生將去申公白公止之曰不為先王

乎穆生曰先王之禮吾三人者為道之存也今而忽之
是亾道亾道之君胡可與久處易稱知幾其神乎不去
楚人將鉗我於市遂謝病而去申公白公獨留故及於
難膠東膠西濟南淄川趙王皆伏誅徙廣川王為趙王
初七國反連齊齊王城守留濟南膠東淄川三國兵共
圍齊齊王使路中大夫使於天子天子令還報齊堅守
路中大夫還三國將劫而與之盟令反其言曰吳已破
漢矣大夫既許至城下望見齊王言漢發兵百萬使太

尉擊破吳楚方引兵救齊必堅守三國之兵殺之齊被
圍急陰與三國約未定會路中大夫至復堅守漢將聞
齊初有謀欲擊齊齊王將閭懼自殺上以齊迫脅非其
罪乃立其太子壽為齊王濟北王志亦初與諸侯通謀
後乃堅守聞齊王自殺而得立嗣志亦欲自殺齊人公
孫攬止之因為說梁王曰夫濟北之地東接彊齊南當
吳越北脅燕趙此四分五裂之國權不足以自守勢不
足以扞寇雖墜言於吳非其正計也昔鄭祭仲許宋人

立公子突以全其君春秋賢之為其以生易死以存易
亡嚮使濟北先見情實則吳必先屠濟北招燕趙而總
之如此山東之從結而無却矣今吳楚之王練諸侯之
兵驅徒衆而與天子爭衡濟北獨厲節堅守不下使吳
失據而無助跬行而獨進瓦解土崩敗而無救者未必
非濟北之力以區區之濟北而與諸侯爭彊是猶羔犢
而扞虎狼也志守職不撓可謂誠一矣功議如此尚見
疑於上願大王詳思惟之梁孝王悅馳以聞濟北王得

不坐徙封於淄川徙衡山王為濟北王吳之反也衡山王勃堅守無二心故謚曰貞王徙廬江王賜為衡山王初吳楚使至淮南王欲發兵應之其相曰主必應之臣願為將王屬之兵相因守城而距吳楚會漢救兵至故淮南王得以完全初鼂錯改制削諸侯地錯父從潁川來諫止之錯曰不然社稷不安父曰劉氏安矣鼂氏危矣遂歸去之曰吾不忍見禍及其身乃服藥而死後十餘日吳楚反鼂氏族矣初謁者僕射鄧公以校尉擊吳

楚還上書言軍事上問吳楚反聞鼂錯死兵罷否對曰
吳楚為謀數十年發怒削地以誅錯為名其意不在錯
也且鼂錯患諸侯彊大故請削之以安京師萬世之利
計畫始行卒受大戮內杜忠臣之口外為諸侯復讎臣
竊為陛下不取也上喟然長息曰公言善吾亦恨之夏
六月立元王子平陸侯禮為楚王續元王後初諸侯得
自除吏御史大夫已下官屬擬於天子國家唯置丞相
黃金印自吳楚反之後奪諸侯權為置二千石去丞相

曰相銀印其後唯得衣食租稅而已貧或乘牛車時藥
布有功封歙侯為燕相有治迹民為之立生祠立皇子
端為膠西王勝為中山王賜民爵一級徙淮南王餘為
魯王徙汝南王非為江都王王故吳國也非年十五有
才氣吳之反也非上書請擊吳上賜非將軍印吳破以
軍功封賜天子旌旗

荀悅曰江都王賜天子旌旗過矣夫唯盛德元功有天
子之勳乃受異物則周公其人也凡功者有賞而已孔

子曰必也正名乎唯器與名不可以假人人君之所司也夫名設於外實應於內事制於始志成於終故王者慎之

四年春復置諸關用傳出入夏四月己巳立皇子榮為皇太子徹為膠東王六月赦天下賜民爵一級七月臨江王闕薨謚哀無子國除

五年春正月作陽陵邑夏募民徙陽邑錢戶二十萬遣公主妻匈奴單于

六年冬十有二月雷雨霖秋九月皇后薄氏廢皇后薄
太后兄女上為太子時太后取以配上無寵無子故廢
梁王來朝上使乘輿馳駟馬逆梁王於闕下入則侍帝
出則同輿梁王侍郎謁者著金貂出入天子殿門與漢
官無異居其國驕僭營東苑方三百餘里廣睢陽城七
十里得賜天子旌旗千乘萬騎出稱警入言蹕擬於天
子珠玉寶器多於京師招延遊士四方竝至梁王親而
有功太后少子愛之太后心欲以為漢嗣大臣袁盎等

十餘人議於前不聽梁王怒之陰使人刺殺盜其餘人未得上疑梁王所為先是齊人公孫詭羊勝多奇邪計初見梁王梁王賜千金官至中尉號將軍常為王內謀上使使案梁捕勝詭勝詭等自殺上召故雲中太守田叔使案梁王具得其事還報曰陛下無以梁為事也今梁王不就誅是漢法不行也若其伏法太后食不甘味卧不安席此憂在陛下上善之以為魯相枚乘鄒陽數諫梁王不聽及梁王事急梁王賞陽千金令求方略士

齊人王先生多奇計鄒陽往見之王先生曰必見王長君長君者王夫人兄也陽發悟於心遂見長君曰竊聞長君女弟幸於後宮而長君行迹多不順道理今梁事既窮竟梁王恐誅此太后怫鬱泣血無所發怒側目切齒於貴臣恐長君危於累卵長君誠為上言之得無竟梁事太后厚德長君而長君之女弟幸於兩宮金城之固也昔舜之弟象日以殺舜為事而舜封之有庠仁人之於兄弟也不含怒不宿怨厚親愛而已魯公子慶父

使僕人殺子般季友不揆其情而誅焉春秋以為失親親之道以此說天子僥倖梁事得不治長君曰敬諾入言之及梁內史韓安國亦因長公主解說梁王卒得不治初陽為勝詭所讒王因囚之將殺之乃從獄中上疏曰臣聞忠無不報信不見疑蓋有以然今定虛矣昔者荆軻慕燕丹之義白虹貫日太子畏之衛先生為秦畫長平之策太白蝕昴昭王疑之夫精誠變於天地而信不喻於兩主豈不哀哉今臣盡忠畢義左右不明卒從

吏訊為世所疑是使荊軻衛先生復出而燕秦不悟矣
昔玉人獻寶楚王誅之李斯竭忠胡亥極刑是以箕子
佯狂接輿避世恐遭此患也願大王察玉人李斯之意
然後改楚王胡亥之聽無使臣為箕子接輿所笑夫偏
聽生姦獨任成亂是以魯聽季孫之說而逐孔子宋信
子罕之計而囚墨翟夫以孔墨之辨不能自免於讒諛
而二國以危者何則衆口爍金積毀銷骨臣聞明月之
珠夜光之璧以闇投之人莫不按劍而怒何則無因而

至前也蟠木根柢輪困離奇而為萬乘之器者以左右
先為之容也故女無美惡入宮見妬士無賢愚入朝見
嫉昔司馬喜臚脚於宋宰相中山范曄折脅於魏卒為
應侯此二人者信必然之畫捐朋黨之私挾孤特之交
故不能自免於讒諛之人是以申徒狄蹈雍之河徐衍
負石入海皆不容於世義不苟取比周於朝百里奚乞
食於路秦穆公授之以政甯戚飯牛車下齊桓公任之
以國此二人者豈素官於朝假譽於左右哉感於心合

於行堅如膠漆衆口所不能離豈惑於浮辭哉是以聖
主不牽於卑亂之語不奪於衆多之口獨化於陶鈞之
上而觀乎昭曠之道臣聞盛飾入朝者不以私汙義砥
礪名號者不以利傷行今欲使天下寥廓之士誘於威
重之權脅於勢位之貴迴面汙行以事諂諛之人而求
親近於左右則士有伏死窟穴巖石之中耳安肯盡忠
信而趨闕下者哉書奏梁王梁王立出之以為上客枚
乘以數諫吳王上拜乘弘農都尉乘久為諸侯上客不

樂為郡吏後自免遊於梁田叔既至魯魯民以王取財
邀相自言者百餘人叔取渠率少咎怒之曰王非汝主
邪何敢自言王王慙乃取中府錢令償之相曰王自使
人償之今令相償之是王為惡而相為善王好遊獵叔
常從王輒休相就館叔坐苑外曰吾王暴露獨何為舍
王以故不復出遊

七年冬十有一月庚寅日有食之春正月皇太子榮廢
為臨江王榮者帝長子栗姬之子嘗囑諸子於栗姬

曰百歲後善視之栗姬素怨言不遜上乃廢姬及太子
栗姬以憂死二月罷太尉官夏四月乙巳立皇后王氏
初皇后嫁為金王孫妻其母臧兒卜相之當貴乃奪金
氏而內太子宫王后方妊身夢日入懷遂生男丁巳立
膠東王徹為太子實王皇后子也中尉衛綰為太子太
傅綰大陵人也為人謹慎敦厚上為太子時嘗召文帝
左右近臣飲酒綰獨稱疾不行及上即位將幸上林詔
綰參乘上謂綰曰今君知所以參乘乎乃我為太子時

召君不來故文皇帝有遺言曰綰長者善遇之六月乙巳丞相陶青免大尉周亞夫為丞相是歲太僕周舍為御史大夫

中元年夏四月赦天下賜民爵一級封周昌孫荀為列侯

二年春令諸侯王薨及列侯初封及之國大鴻臚奏謚誅策列侯薨及諸侯王太傅初除之官大行奏謚誅策王薨遣光祿大夫弔襚祠贈視喪事因立嗣列侯薨遣

太中大夫弔祠視喪事立嗣其葬國得發民輓喪穿復
土治冢無過三百人畢事三月臨江王榮坐侵宗廟塼
垣為宮上徵榮臨江官屬祖榮於北門外升車軸折父
老泣曰我王不還矣至邸王詣中尉郅都責訊王王恐
自殺葬藍田有驚數千萬頭銜土置冢上百姓憐之無
子國除郅都河東人也為人剛勇而有氣公廉嘗稱曰
背親事君固當奉節死職終不顧妻子矣嘗從上入上
林賈姬在廁野豕入廁上目都都不行上欲持兵救賈

姬都伏上前曰亡一姬復一姬進陛下縱自輕奈高廟
太后何上還豕亦不傷賈姬都為中尉丞相條侯至貴
倨也而都揖之貴戚宗室側目而視號曰蒼鷹是時濟
南閻氏三百餘家豪猾放縱二千石莫能折也及都為
濟南守誅閻氏首惡郡中震慄道不拾遺旁十餘郡畏
都如大府後為鴈門太守匈奴不敢近鴈門胡王為偶
人像都令騎射莫能中其見憚如此匈奴中以法帝欲
釋之太后以臨江王之死也怨之遂斬都是時甯成周

陽由亦皆嚴剋為治成為濟南都尉郅都為守始都尉
皆步入府門因吏謁見如縣令及成至直凌都出其上
然都素聞其聲亦與結歡後成為中尉其治放郅都其
廉弗及也自此之後吏治多放成由者己是時季布弟
季心亦任俠立然諾作氣蓋關中方數千里士爭為之
死心為中尉司馬郅都為中尉不敢加也夏四月有星
孛於西方立皇子越為廣川王寄為膠東王秋七月更
郡為太守尉為都尉九月封楚趙傅相死事者四人子

為列侯甲戌晦日有食之

三年冬十有一月罷諸侯王御史大夫官夏四月旱秋九月蝗有星孛于西方戊戌晦日有食之既丞相周亞夫免御史大夫周舍為丞相立皇子乘為清河王太子太傅衛綰為御史大夫

四年春三月起德陽宮夏蝗秋赦天下徙作陽陵者死罪欲腐刑者許之十月戊午日有食之

五年夏四月立皇子舜為常山王六月赦天下賜民爵

一級秋八月己酉未央東闕災九月詔曰獄者人之大命死者不可復生諸獄疑雖文致於法人心不厭者輒
謝之

六年冬十月行幸雍祠五時十有二月定鑄錢偽黃金
法索市令春三月雨雪夏四月梁王武薨謚曰孝王時
梁王北獵梁有獻牛足出背上本志以為牛禍思心務
亂之咎也乃分梁為五國盡封梁孝王男五人女五人
皆食湯沐邑五月丙戌立梁孝王子明為濟川王昴為

淄川王彭離為濟南王定為山陽王識為濟陰王不疑
為衡山王詔令吏二千石車朱兩輪千石至六百石車
朱左輪詔有司減笞法自除肉刑之後笞五百三百率
多死者故定律笞五百曰三百三百曰一百猶尚不全
又詔曰笞者所以教之也其宜定捶令長五尺其本大
一寸末大半寸皆平其節當髣笞者不得更人笞畢一
人笞乃更人自是笞者得全六月匈奴入鴈門至武威
酒泉邑入上郡取苑馬吏卒戰死者三千人秋七月辛

亥晦日有食之

後元年春正月詔曰獄者重事也其疑獄有令讞之而後不當讞者不為失三月赦天下賜民爵一級中二十石諸侯相爵右庶長夏大酺五日五月地震秋七月丙午丞相周舍免乙巳先晦一日日有食之八月壬辰御史大夫衛綰為丞相衛尉直不疑為御史大夫不疑南陽人也好黃老術隱名迹初為郎其同舍郎有告歸者誤持其同舍郎金去郎意不疑不疑買金償之後告歸

者還乃知之或毀不疑淫嫂不疑曰我乃無兄終不自
明矣吳楚反時為將軍封塞侯條侯周亞夫下獄死時
為父買尚方工官甲稍五百枝可以葬者取庸治之不
與顧直庸怒而上變反告之事連亞夫召至廷尉責問
君侯欲反邪亞夫曰臣所買乃葬器何謂反乎吏曰君
侯縱不反地上即反地下耳初捕亞夫亞夫欲自殺其
夫人止之及至廷尉因不食五日嘔血死亞夫為河內
太守許負相之曰君侯三年為侯八年為將九年為相

貴重於人臣無二其後當餓死縱理入口餓死法也居
三歲兄勝有罪免文帝封亞夫續絳侯後盡如負言上
欲廢栗姬太子亞夫固爭之不得上由是疏之而梁孝
王以吳楚之圍怨亞夫不救每朝嘗與太后言亞夫之
短太后欲封其兄王信上謙讓不許太后曰人生各以
時行耳竇長君在時不得侯及死其子彭祖乃侯吾甚
恨之帝趣侯信也上曰請得與丞相計之亞夫曰高皇
帝約非劉氏不王非有功不侯不如約者天下共擊之

上默然遂不封

荀悅曰高皇帝刑白馬而盟曰非劉氏不王非有功不
侯不如約者當天下共擊之是教下犯上而興兵亂之
階也若後人不修是盟約不行也書曰法惟上行不惟
下行若以為典未可通也匈奴徐盧等五人降上欲封
之亞夫曰彼背其王陛下何以責人臣守節哉上曰丞
相議不可用乃悉封之

荀悅曰春秋之義誅叛臣者不一而足也若以利害由

之則以功封其逋逃之臣賞有等差可無列土矣上嘗
居禁中召亞夫賜食獨置大戢無鬻又不置箸亞夫心
不平顧謂掌席者取箸亞夫前食既出上目送之曰此
怏怏非少主之臣也亞夫以數忤上意故得罪也

二年冬十月詔省列侯之國春匈奴入鴈門太守馮敬
與戰死發車騎材官屯鴈門以歲不登禁食馬粟食馬
粟者沒入之封皇后兄王信為益侯夏四月詔曰雕文
刻鏤傷農事者也錦繡纂組害女功者也農事傷則饑

之本女功害則寒之原夫饑寒並至能不為非者寡矣
朕親耕后親桑以奉宗廟粢盛祭服以為天下先不受
獻減太官省徭賦欲天下務農蠶常有畜積以備災害
彊無凌弱衆不暴寡耆老以壽終孤幼得遂長今歲或
不登民食頗寡其咎安在或詐為吏以貨賂為市盜奪
百姓侵侮萬民縣丞長吏縱姦法與盜甚無謂也其令
二千石各修其職不事官職耗亂者丞相以聞請其罪
布告天下使明知朕意自漢初務勸農累世承業至是

始天下殷富家給人足京師之錢累百巨億貫朽而不
可校太倉之粟充實露積於外腐敗而不可食衆庶街
巷有馬阡陌之間成羣守閭閻者食梁肉為吏者長子
孫居官者以官為姓號人人自愛而重犯法仁義興焉
三年春正月詔萬民采黃金珠王者坐贓為盜詔曰高
年者人所尊敬鰥寡孤獨者人所哀憐也其令八歲以
下八十以上及孕子未乳當鞠繫者無訟繫之甲午帝
崩于未央宮遺詔賜諸侯王列侯馬二駟吏二千石黃金

二斤民戶百錢出宮人復終身

讚曰本紀稱周秦之弊密文峻法而姦不勝漢興埽除苛政與民休息至於孝文加之恭儉孝景遵業五六十載之間至於移風易俗黎民醇厚周云成康漢稱文景美矣

前漢紀卷九

欽定四庫全書

前漢紀卷十

漢 荀悅 撰

孝武一

皇帝甲子即位年十六二月癸酉孝景帝葬陽陵三月
尊太后母臧兒為平原君封田蚡田勝為列侯臧兒初
為槐里王仲妻生太后後改嫁長陵田氏生蚡及勝
建元元年冬十月詔舉賢良方正丞相衛綰奏所舉賢

良或治刑名縱橫之術亂國政罷之春二月赦天下賜
民爵一級民年八十復二算九十復甲卒行三銖錢夏
四月詔民年九十已上復子若孫令奉供養五月詔修
山川之祀六月丞相衛綰免丙寅魏其侯竇嬰為丞相
武安侯田蚡為太尉秋七月詔省衛士卒萬人罷苑馬
賜貧民遣使者安車蒲輪束帛加璧徵魯申公議立明
堂申公年八十餘矣上問以政事對曰為治者不在於
多言顧力行何如耳拜為太中大夫漢興草創尚簡易

未甚用儒者而竇太后好黃老術故諸博士具官待問
未有進者至上即位乃崇立太學矣

二年冬十月丞相竇嬰太尉田蚡皆免御史大夫趙綰
郎中令王臧下獄死蚡嬰綰臧皆同心欲興太學建立
明堂以朝諸侯而嬰請無奏事太皇太后又罷竇氏子
弟無行者絕屬籍故毀謗日至竇太后怒皆抵之罪明
堂遂不立春二月丙戌朔日有食之三月己未太常許
昌為丞相夏四月戊申有星如日夜出初置茂陵邑徙郡

國豪傑於茂陵河內郭解在徙中衛將軍為言解家貧不應徙上曰解布衣權至使將軍知之此不貧也及解徙諸公贈送出千餘萬解任俠睚眦上崖下柴觸死於塵中者甚衆藏匿亡命攻剽作姦不可勝數然折節恭約厚施而薄望解嘗出有人箕踞視之者解問其姓名客欲殺之解不聽乃陰使吏脫其徭役其人乃肉袒謝罪解姊子與人爭不直人殺之自歸解解曰吾兒不直公殺之故當縱之諸公聞之皆多賢解洛陽人有相仇者賢

豪居其間以十數人不能和解客乃令解見仇家仇家聽命解夜至夜去解乃謂仇家曰解如何從他郡奪人邑中權乎且須士大夫復居其間乃聽之其居家夜過半後門閭住居嘗十餘乘有與解忤者少年輒為報仇不使解知也解兄子為解殺人為其家人上書訟之又殺之闕下上捕解解亡過臨晉籍少翁少翁素不知解然慕其名送之出關自殺以絕口語其得人率如此賢豪知與不知聞聲爭與交歡後捕得解所犯皆在赦前

後有謗毀解者客殺之斷其舌解實不知有司奏解無罪時公孫弘為丞相以為解布衣以睚眦殺人雖不知甚於知遂族之

荀悅曰世有三遊德之賊也一曰遊俠二曰遊說三曰遊行立氣勢作威福結私交以立彊於世者謂之遊俠飾辨辭設詐謀馳逐於天下以要時勢者謂之遊說色取仁以合時好連黨類立虛譽以為權利者謂之遊行此三遊者亂之所由生也傷道害德敗法惑世失先王

之所慎也國有四民各修其業不由四民之業者謂之
姦民姦民不生王道乃成凡此三遊之作生於季世周
秦之末尤甚焉上不明下不正制度不立綱紀廢弛以
毀譽為榮辱不核其真以愛憎為利害不論其實以喜
怒為賞罰不察其理上下相冒萬事乖錯是以言論者
計薄厚而吐辭選舉者度親疎而舉筆善惡謬於衆聲
功罪亂於王法然則利不可以義求害不可以道避也
是以君子犯禮小人犯法奔走馳騁越職僭度飾華廢

實競趨時利簡父兄之尊而崇賓客之禮薄骨肉之恩而篤朋友之愛忘修身之道而求衆人之譽割衣食之業以供饗宴之好苞苴盈於門庭聘問交於道路書記繁於公文私務衆於官事於是流俗成矣而正道壞矣遊俠之本生於武毅不撓久要不忘平生之言見危授命以救時難而濟同類以正行之者謂之武毅其失之甚者至於為盜賊也遊說之本生於使乎四方不辱君命出境有可以安社稷利國家則專對解結辭之懌矣

民之莫矣以正行之者謂之辨智其失之甚者至於為
詐給徒衆矣遊行之本生於道德仁義汎愛容衆以文
會友和而不同進德及時樂行其道以立功業於世以
正行之者謂之君子其失之甚者至於因事害私為姦
宄矣其相去殊遠豈不哀哉故大道之行則三遊廢矣
是以聖王在上經國序民正其制度善惡要於公罪而
不淫於毀譽聽其言而責其事舉其名而指其實故實
不應其聲者謂之虛情不覆其貌者謂之偽毀譽失其

真者謂之誣言事失其類者謂之罔虛偽之行不得設
誣罔之辭不得行有罪惡者無僥倖無罪過者不憂懼
請謁無所行貨賂無所用民志定矣民志既定於是先
之以德義示之以好惡奉業勸功以敦本務不求無益
之物不畜難得之貨絕靡麗之飾遏利欲之巧則淫流
之民定矣而貪穢之俗清矣息華文去浮辭禁偽辨絕
淫智放百家之紛亂一聖人之至道則虛誕之術絕而
道德有所定矣尊天地而不瀆敬鬼神而遠之除小忌

去淫祀絕竒怪正人事則妖偽之言塞而性命之理得
矣然後百姓上下皆反其本人人親其親尊其尊修其
身守其業於是養之以仁惠文之以禮樂則風俗定而
大化成矣

三年春河水決溢於平原大饑人相食賜茂陵徙者戶
錢二十萬田二頃初作便門橋秋七月有星孛於西北
濟川王明廢遷房陵坐殺太傅中尉閩越圍東甌告急
上以問太尉武安侯田蚡蚡以為越人相攻其常事也

又數反復不煩中國自秦時棄之不內屬詔會議太中大夫嚴助詰蚡曰但患力不能救德不能覆誠能何棄之且秦時舉咸陽而棄之何乃越乎今小國以窮困告急於天子天子不能救當安所訴又何以子萬國乃遣助使持節發會稽兵救之未至閩越走九月丙子晦日有食之起上林苑時上使太中大夫吾丘壽王舉籍鰲屋以東宜春以西北至阿城屬之南山提封頃畝價直欲除以為苑侍郎東方朔進諫曰臣聞謙遜靜慙天應以

福驕盈奢靡天應以禍鄴鄙之間號曰土膏其價畝直一金規以為苑上乏國家之用下奪農桑之業不可一也盛荆棘之林崇虎狼之墟壞民冢墓發民廬舍令幼小懷土而思考老流淚而悲不可二也斥而營之垣而囿之馳騎逐東西車輦駕南北有深溝大渠險阻之危不可三也務苑囿之大不卹農時非所以彊國富民也夫殷作九市之宮而諸侯叛楚靈王起章華之臺而楚人散秦興阿房之殿而天下亂上乃賜金百斤拜為太

中大夫然猶起上林苑朔字曼倩平原人也好學稱為滑稽年二十二初為郎中上書自稱待詔公車奉祿薄朔謂侏儒曰上欲盡殺汝侏儒大恐皆叩頭號泣上召問朔朔對曰侏儒長三尺臣朔長九尺三寸俸祿正等侏儒侏儒飽欲死臣朔飢欲死臣言可用宜異其祿不可用罷之無但虛索長安米也上大笑使待詔金馬門稍稍親近之上置守宮於盆下使筮者射之莫能中朔自請布卦射之曰臣欲以為龍復無角臣欲以為蛇復

有足跂跂脈脈善緣壁此非守宮當是蜥蜴上曰善復
使射他物連中輒賜帛時有幸倡優郭舍人等曰朔幸
中耳乃復覆置樹上寄生於盆中曰朔知之榜臣百不
中賜臣帛朔曰是竄數也舍人曰朔果不能中朔曰溼
肉為膾乾肉為脯樹上為寄生盆下為竄數乃榜舍人
百朔對問響應權變鋒出文章辭令縱橫無窮上頗倡
優畜之然而時發忠直之言極諫尤亦以此異焉朔因
設客難已用位卑以自慰諭又設非有先生之論其辭

曰非有先生仕於吳默然無言者三年吳王怪而問之
曰可以談矣先生伏而唯唯王曰可以談矣先生曰於
戲可言乎哉談何容易王曰何為其然也寡人將聽焉
先生對曰昔關龍逢深諫於桀王子比干直言於紂此
二臣者皆盡忠極慮將以為君之榮除君之禍也然以
蒙不辜之戮為天下笑飛廉惡來巧言利口以進其身
陰奉雕琢刻鏤之好以納於上快耳目之欲以苟容為
度而見親近故宗廟崩弛國家丘墟夫卑身賤體悅色

微辭愉愉句句終無益於主上之治即志士仁人不忍
為也儼然而作矜莊之貌深言直諫上以拂人主之邪
下以除百姓之害則忤於時主之心離於衰世之法故
養性愛命之士莫肯進也遂隱居深山以詠先聖之風
是以伯夷叔齊餓于首陽之下後世稱其仁如是邪主
之行固足畏也故曰談何容易於是吳王瞿然易容為
坐而聽之先生曰昔伊尹負鼎於湯太公釣於渭濱而
遇文王心合意同謀無不成計無不從誠得其君也故

能誅暴亂總遠方一統類美風俗而王業興矣太公伊尹以如此龍逢比干獨如彼豈不哀哉故曰談何容易於是吳王默然俛而深思仰而泣曰嗟乎殆哉予國之不亡也繇繇哉聯聯哉於是正明堂之朝齊君臣之位舉賢才布德惠施仁義恭儉節約減后宮之費損車馬之用放鄭聲遠佞人省庖厨去奢靡卑宮室壞苑囿填池塹以與貧民開內藏以資貧乏存耆老恤孤獨薄賦斂省刑罰行此三年陰陽調和萬物咸寧國無災害之

變民無飢寒之色蓄積有餘囹圄空虛鳳皇來集麒麟
在郊遠方異俗慕義向風治亂之道存亡之端若此易
見然而人主莫肯為也悲夫是時上以安車蒲輪迎枚
乘乘年老道死而乘子皋亦以談說能為辭賦得幸比
朔上好自擊熊豕中郎司馬相如從上獵長楊長卿上
疏諫曰臣聞物有同類而殊能者故力稱烏獲捷言慶
忌勇期貪育然臣之愚竊以為人誠有之獸亦宜然今
陛下好陵險阻射猛獸卒然遇羣之獸駭於不存之

地犯屬車之清塵與不及還轅馬不及旋踵人不暇施巧雖有烏獲逢蒙之技而不及用枯木朽株盡為患難矣是胡越起於轂下而羌夷接軫矣豈不殆哉雖曰萬全而無害然本非天子所宜近也且夫清道而後行中路而後馳猶時有銜橛之變況涉乎豐草馳乎丘墟前有利獸之樂內無存變之計其為害也不難上善之相如字長卿蜀郡成都人也初家貧與臨邛令王吉相善富人卓王孫置酒請令并請相如相如善鼓琴王孫

寡女字文君好音夜奔相如遂與俱歸成都後家貧夫妻酤酒臨邛卓王孫恥之杜門不出後不得已乃厚分財物遺文君而相如作子虛賦上得讀而善之曰朕獨不得與此人同時或對曰司馬相如所作也上驚乃召相如復奏上林賦拜為郎中子虛上林皆言苑囿之美卒歸之於節儉因託以諷焉相如口吃而善著書

四年夏有氣赤如血六月旱秋九月有星孛于東北江都相陳人鄭當時為內史每朝候上間未嘗不言天下

之長者其推轂名士嘗以為賢於已祿賜盡以饋士大夫家無餘財賓客甚盛及中廢賓客衰落先是下邳翟公為廷尉賓客填門及廢門外可設雀羅復廷尉客復往翟公大板署其門曰一死一生乃知交情一貧一富乃知交態一貴一賤交態乃見冬十月地震是歲武彊侯嚴青翟為御史大夫

五年春正月己巳朔日有食之行半兩錢罷三銖錢初置五經博士博士本秦官掌通古今貲至數十人漢置

五經而已太常選人年十八以上好學補弟子郡國有
好文學敬鄉里者令與計偕受業太常補弟子一歲輒
課通經一藝補文學掌故高第為郎中其秀才異等太
常以名聞其下才不事學者罷之是時廬江人文翁為
蜀郡太守其為人愛學好教化見蜀地僻陋有蠻夷之
風文翁乃選郡縣小吏有才器者輒給資用令詣博士
受業還皆以為右職用察舉之又修起學宮於城中學
者復除徭役嘗選學宮童子所在便坐受書每事嘗出

入行縣益從諸生明經修行者使傳教出入縣邑見而榮之由是蜀邑大化學者比齊魯焉郡國學校官自文翁始也夏四月平原君薨五月大蝗秋八月廣川王越薨清河王乘薨

六年春三月乙未遼東高廟災夏四月壬子高園便殿災上素服五日其後太中大夫董仲舒居家推其意以高廟不當居遼東高園便殿不當居陵旁於禮不當立廟在外像諸侯不正者高園在內像大臣不正者天誠

若曰去諸侯大臣貴幸不正者云爾時太中大夫主父
偃素妒嫉仲舒竊其書奏之仲舒下獄吏當死詔宥之
本志以為淮南王田蚡之應也五月丁亥太皇太后崩
六月癸未丞相許昌免武安侯田蚡為丞相秋七月有
星出于東方長終天本志曰是為蚩尤之旗似彗星而
後曲見則天子征伐四夷之應也閩越圍南越南越
守天子約不敢發兵上遣大司農韓安國帥師出會稽
大行王恢出豫章救之淮南王安上書諫曰越方外之

國斷髮文身之人不可以冠帶之國法度治之自三代之盛明胡越不與受正朔非彊不能服也以為不居之地不牧之民不足以煩中國古者封內甸服封外侯服侯外賓服蠻夷要服戎狄荒服遠近之勢異也越人名為蕃臣實不給上事自相攻擊耳陛下以兵救之是反以中國勞蠻夷也且越人故數反覆非一一不奉詔舉兵誅之臣恐中國兵革無時得息也間者歲比不登民生未復今發兵行數千里舉輜而踰嶺拖舟而入水行

數千里夾以深林叢竹又多蝮蛇猛獸夏月暑時則生吐泄霍亂之病曾未接兵死傷者必衆矣或以越人衆兵彊能作難邊地臣竊聞之與中國異限以高山人迹隔絕車道不通天地所以絕内外也其入中國必先下嶺水嶺水之山峻峭漂石破舟不可大船運糧下也越人欲為變必先田餘干界中積糧食乃入山伐材治船邊地守候誠使謹防越人有伐材輒收捕之焚其積聚雖百越無奈邊城何也臣聞越卒不下數十萬人所以

入者五倍乃足挽車奉餉不在其中且越非有城郭邑里也處谿谷之間篁竹之中習於水關便於用舟中國之人不知其地勢不能服其水土雖有彊兵百不當一臣安竊為陛下重之臣聞閩越王弟甲殺其王甲以誅死其民衆未有所屬陛下若欲納之中國遣重臣臨問存恤施德垂賞此必攜幼扶老以歸聖德若無用之則繼其絕世存其亡國建其侯王此必委質為蕃臣矣陛下以方寸之印尺二之組鎮撫方外不勞一卒不頓一

戰而威德並行天下歸服今以兵深入其地此必震恐
以有司為欲屠滅之也必雉兔逃竄深入阻險背而去
之則復羣聚留而守之卒勞糧乏丁壯從軍老弱饋餉
男子不耕婦人不織居者無食行者無糧萬民苦於兵
事逃亡必衆隨而誅之不可勝盡盜賊必起臣聞秦時
嘗使尉屠睢擊南越又使監祿鑿渠通道越逃入山林
不可得攻留軍屯守空地曠日彌久士卒勞倦越人乃
出擊之秦師大敗乃發兵戍當此之時內外騷動百姓

疲弊行者不還往者莫返天下之人皆不聊生逃竄相聚羣為盜賊是故山東之難興矣兵者凶器也一方有急四面皆聳臣恐變故姦邪從此始矣易曰高宗伐鬼方三年克之以盛德之天子伐小蠻夷而猶三年言用兵之難也陛下以四海為境九州為家八數為圉江漢為池人徒之衆足以奉千官之供租稅之人足以供乘輿之御玩心神明秉執聖道負黼宸憑玉几南面而聽斷號令天下莫不響應使元元之民皆安土樂業則澤

被萬世施之無窮天下之安猶若太山而四維夷狄之地何足以為一日之間煩汗馬之勞詩云王猶允塞徐方既來言王道甚大而遠方懷之也是時兵已出未逾五嶺會閩越王弟餘善殺王以降漢罷兵上嘉淮南王之意美將帥之功乃遣嚴助喻淮南之意且諷切南越南越頓首遣太子隨助入侍是時嚴助薦邑子朱買臣為中大夫買臣因言東越王故居泉山一夫守險千夫不能上今更徙南五百里居大澤中今發兵浮海直至

泉山陳舟列騎席卷南行必破滅也上即拜買臣會稽太守上謂之曰富貴不歸故鄉如衣錦夜行今還故鄉富貴於子如何買臣頓首謝上既到郡與橫海將軍韓說等俱擊東越大破有功初買臣家貧好讀書樵薪自給吟咏且行時人謂之癡其妻恥之而去買臣笑曰我年五十富貴今四十八矣待我富貴當報汝勤苦其妻恚曰嘻公終餓死耳何以報我遂改嫁其後買臣嘗負薪於墓間故妻與其夫俱上冢以為得志見買臣飢寒

呼飲食之後數歲為會稽太守故妻與其後夫治道甚窮乏買臣命後車載其夫婦置後園中給衣食經數月妻自縊死東海太守汲黯為主爵都尉黯字長孺東郡人也好直諫上曰吾欲興政治法堯舜何如黯曰陛下內多欲而外施仁義如何欲效堯舜之治乎上大怒變色而罷朝羣臣共數黯黯曰天子置公卿輔弼之臣寧令從旨順意陷主於不義乎自丞相宴見上或時不冠至見黯必冠上嘗在武帳不冠望見黯奏事避入帷中

使人可其奏其見敬禮如此初東越人相攻黠為中謁者使越不至而報上曰越人相攻其常俗也不足勞天子之使者河內失火燒千餘家使黠視之還曰人家屋相比火相連乃不足為怪臣憂有甚於此者憂河內飢民相食臣謹以按節發河內粟以賑飢民請受矯制之罪上賢而赦之上嘗問嚴助曰汲黯何如人助曰使黯任職居官無以逾人然至其輔少主威四夷守城郭愛百姓雖自謂賁育不能奪也上曰然古有社稷之臣黯

近之矣御史大夫嚴青翟免大司農韓安國為御史大夫



前漢紀卷十

欽定四庫全書

史部

前漢紀卷十一至
四

詳校官編修

臣范來宗

洗馬臣王坦修覆勘

總校官原任中允臣王燕緒

校對官中書臣朱炘

謄錄監生臣羅允文

欽定四庫全書

前漢紀卷十一

漢 荀悅 撰

孝武二

元光元年冬初令郡國貢孝廉各一人董仲舒始開其議仲舒廣川人也初景帝時為博士下帷讀書弟子以次傳授其業或莫見面蓋三年不闕其園其精專如此進退容止非禮不行學士皆尊師之後應賢良舉上策

曰夫守文之君常塗之士欲明先王之道以戴翼其世者甚衆然猶不能豈所操持失其統歟固天降命不可復反歟必推之於大衰而後息歟三代受命其符安在災異之變何緣而起性命之情或天或壽或仁或鄙習聞其號未昭其理今欲風流而令行刑輕而姦改何修而臻於此其明以喻朕意靡有所隱仲舒對曰臣謹案春秋以觀天人之際甚可畏也國家將有失道之敗而天乃先出災害以譴告之不知自省又降怪異以驚恐

之尚不知變而後傷敗乃至自非大無道之世天欲盡扶持而全安之事在勉彊而已勉彊學問則聞見博而智益明矣勉彊行道則德日起而大有功矣詩云夙夜匪懈書云懋哉懋哉皆勉彊之謂也昔周道衰於幽厲非道亡也而幽厲不由道也宣王修文武之業周道粲然復興矣非天降命不可反復也所操持悖謬失其統也臣聞非人力所致而自至者此受命自然之符也天下同心歸之若子歸父母是亦受命之符也夫天瑞應

精誠而至書曰白魚入於王舟有火復於王屋流為赤
烏此蓋受命之符也及末代衰微廢德義任刑罰刑罰
不中則生邪氣邪氣積於下怨惡畜於上上下下不和則
陰陽繆戾而妖孽生矣此災異所緣而起也臣聞命者
天之令也性者生之質也情者人之欲也或夭或壽或
仁或鄙陶冶而成之不能純粹有治亂之所生故不能
齊一也堯舜行德則民仁壽桀紂行暴則民鄙夭天下
之從上猶泥之在鈞唯陶者之所為綏之斯來動之斯

和此之謂也臣謹案春秋求王道之端得之於正正次王王次春春者天之所為也正者王之所為也其意曰上承天之所為下以正已所為也然則王者所為必則於天道天道之大者在於陰陽陽為德陰為刑刑德不失而歲功成今廢先王德教之官而獨任執法之吏而欲德化之被四表固難成也春秋謂一為元一者萬物所從始也元者辭之所謂大也謂一為元者示大始而欲正其本也故為人君者正其本心以正朝廷朝廷正

以正萬民萬民正以正四方四方正遠近莫不皆正也
則陰陽調而風雨時羣生和而萬物植福祥畢至而王
道成矣孔子曰鳳鳥不至河不出圖吾已矣夫自傷可
以致此物而身卑賤不能致也今陛下居得致之位又
有能致之資然而天地未一應瑞者凡以教化之不立
而萬民不正故也民之從利如水之走下非教化隄防
之不能禁也聖人之繼亂世埽除其迹而去之復修教
化而崇起之夫秦滅先聖之道為苟且之治故立十四

年而亡其遺毒餘戾至今未滅琴瑟不調甚者必解而更張之為政而不行甚者必變而更化之漢承暴秦之後宜變其迹乃可善治三代相救夏尚忠商尚敬周尚文今漢宜少損周之文用夏之忠王者有改制之名無變道之實然所祖不同者救病扶衰所遭之變然也又曰古所謂功者以任官稱職為差不謂積日累久也小材雖繁日不離於小官賢才雖未久不害為宰相是以有司竭力盡知務治其業今則不然累日以取貴積

久以致官是以賢不肖不得其真宜勿以日月為功試以賢能為實使郡國各擇吏民之賢者歲貢二人以給宿衛所貢得賢者有賞不肖者行罰如此率天下賢能可得而官也又曰積小者大慎微者著積善在身猶長日加益人不知也積惡在身猶火之消膏人不見也非明乎情性察乎流俗者孰能識之天之所分與與之齒者去其角傳其翼者兩其足是所受者大不得取其小也古之食祿者不食於力是與天意同也昔公儀休相

魯去織婦拔園葵曰臣也已食祿矣又奪園夫工女之
利乎夫遑遑求財利常恐匱乏者庶人之意也遑遑求
仁義常恐不能化民者大夫之意也易曰負且乘致寇
至此言處君子之位者不可為庶人之行也又曰春秋
大一統一者天地之常經古今之通義也今師師異道
人人異論百家殊方旨意不同是以上無以持一統法
制數廢下不知所守臣愚以為諸不在六藝之科非孔
氏之術者皆絕其道勿使並進邪僻之說滅息然後統

紀可一法度可明民知所從矣仲舒對策擢為江都相時易王甚驕而好勇問仲舒曰越王與大夫泄庸種蠡謀伐吳遂滅之孔子稱殷有三仁焉寡人亦以為越有三仁仲舒對曰昔魯君伐齊問柳下惠曰吾伐齊何如對曰不可歸而有憂色曰吾聞伐國者不以問仁人此問何為至於我哉徒見問耳且猶羞之况設詐而伐吳乎由是言之越曾無一仁矣仁人者正其誼不謀其利明其道不計其功是故仲尼之門五尺之童羞稱五伯

為其先詐力而後仁義也王曰善哉及其去位居家絕
不問家產業以修學著書為事所著凡百二十三篇而
說春秋事復數十篇朝廷有大議使者就其家而問之
國家大議多仲舒發之春二月丙辰晦日有食之驍騎
將軍李廣屯雲中車騎將軍程不識屯鴈門以備匈奴
六月罷廣隴西人也為將得士衆心無部曲行陣善就
水草頓舍人人自便不擊刁斗自衛幕府少文書而程
不識正行伍部曲營陣擊刁斗自衛吏治軍簿至明士

卒不得自便而俱為名將夏四月赦天下復七國宗室
前絕屬者五月詔舉賢良秋七月癸未日有食之是歲
天星盡動搖上問候星者對曰星搖民將勞也

三年冬十月行幸雍祠五時始詔公卿議伐匈奴匈奴者其先
夏后氏之苗裔其在於古曰淳維匈奴始祖名薰粥氏
山戎獫狁是也始祖居於北邊隨水草畜牧而轉徙居
無城郭耕田之業然亦各有分地無文法以言語為約
束其俗寬則射獵急則習戰長兵則弓矢短兵則矛鋌

見利則進不利則退食肉衣皮壯者食肥老者飲食其餘父死則妻其後母弟兄死皆娶其妻其俗有名不諱無大字自商周已來世為中國患至匈奴姓孛鞬氏國人稱之曰撐犁孤塗單于匈奴謂天為撐犁謂子為孤塗若言天子也單于者廣大之貌言其象天單于然也置左右賢王左右谷蠡左右大將左右大都尉左右大當戶左右骨都侯凡二十四長其大臣皆世官職左賢王將居東方上谷之東北接穢貊朝鮮右賢王將居西方

治上郡西接氐羗而單于庭直代郡雲中歲正月諸王
長少會單于庭五月大會龍城而祭其先祖天地鬼神
秋大會蹕林校閱人畜其法拔刀尺者死盜者沒入其
家財單于朝拜日夕拜月其座長左而北面日尚戊己
其送死有棺槨衣衾而無封樹喪服近幸臣妾從死者
多至數十人舉事常隨月月盛壯則進兵月虧則退兵
其攻戰斬首虜則賜一卮酒而得所虜獲因以與之得
人因為奴婢故其戰人人自趨利秦始皇時使蒙恬將

數十萬衆北擊胡悉收河南地因河為塞築四十四縣城臨河徙謫人民以充之因山險谿峻繕治之起臨洮至遼東萬餘里是時匈奴單于曰頭曼頭曼不勝秦北徙十有餘年頭曼太子名冒頓殺父而立是時東胡彊盛使使請冒頓千里馬冒頓問羣臣羣臣皆曰此匈奴寶馬也勿與冒頓曰奈何與鄰國愛一馬乎遂與之又使人請冒頓一關氏冒頓問左右左右皆怒請擊之冒頓曰奈何與鄰國愛一女子乎復以與之東胡以冒頓

為畏已愈驕匈奴間有棄地不居者千里東胡又使求之冒頓問羣臣羣臣或曰此棄地與之於是冒頓大怒曰地者國之本也何與之有斬言與地者即上馬令有後出者斬遂東襲擊東胡東胡不設備遂破滅東胡又西擊月氏既歸南并樓煩白羊河南悉收秦所奪地遂入侵燕代北服渾窳屈射丁零隔昆龍新犂之國控弦之士三十餘萬自古已來唯冒頓為彊大高帝有平城之圍後冒頓為書戲慢甚不敬高后怒詔羣臣議擊之

樊噲曰願將十萬衆橫行匈奴中季布曰噲可斬也高
帝困於平城噲為上將軍不能以四十萬解高祖之圍
而欲以十萬乘橫行匈奴中是面謾也且夷狄如禽獸
得其善言不足喜得其惡言不足怒高后曰善乃遣使
報單于書卑辭厚荅遺以御車二乘馬二駟單于又遣
使來謝至文帝遺老上單于書封以尺一牘印曰皇帝
敬問單于單于報以尺二牘封皆大辭曰天地所生日
月所置匈奴大單于敬問皇帝自是數侵邊及單于背

約寇邊無已於是上議伐之大行王恢曰匈奴和親率
不過數歲請擊之御史大夫韓安國以為匈奴輕疾之
兵也至如颶風去如流電居處無常難得而制今將卷
甲親舉深入長驅從行則迫脅橫行則中絕徐行則後
利疾行則糧乏難以為功聖人以天下為度者也不以
私怒傷天下公議故高帝始結和親孝文遵其約二聖
之迹足以為效王恢曰五帝不相襲禮三王不相沿樂
各因時宜也且言擊之者固非發兵而深入也將順單

于之欲誘而致之於邊選驍騎羽林壯士陰為之備吾
勢已定或營其左或營其右或當其前或當其後單于
必可擒也上從恢議夏六月護國將軍韓安國驍騎將
軍李廣輕車將軍公孫賀屯騎將軍王恢材官將軍李息
襲匈奴陰使鴈門馬邑豪聶壹詐亡入匈奴謂單于曰
吾能斬馬邑令以降則物可盡得也單于愛信之令歸
為間壹乃詐斬死罪囚頭懸邑城上以示單于使者使
者還單于乃將十萬騎入武川塞是時漢兵三十餘萬

伏馬邑旁草中王恢李息約從代出擊輜重單于未到
馬邑百餘里鴈門尉吏行徼單于大驚而還曰吾得尉
吏天也以為天王乃遠走兵追至塞不及乃罷上大怒
恢首謀不出兵擊單于輜重也恢自殺時主父偃上書
諫伐匈奴曰臣聞怒者逆德兵者凶器爭者末節數戰
窮武未有不悔者也始皇務勝不休欲攻匈奴李斯諫
曰匈奴無城郭之居委積之守遷徙鳥竄難得而制也
輕兵深入糧食必絕運糧以行重不及事得其地不可

以耕而食也得其人不可役而畜也勝必殺之非仁德也疲弊中國甘心匈奴非完計也始皇不聽出兵攻胡却地千里皆澤鹵不生五穀然後發天下丁男以戍河北飛芻輓粟以遠轉輸率三十鍾而致一石天下所以叛也夫兵久則變生事苦則慮易周書曰安危在出令存亡在所用願陛下熟計之偃凡上九事其一事諫伐匈奴其八事為律令燕人徐樂上書曰天下之患在於土崩不在瓦解秦之末世天下大壞是謂土崩吳楚七

國之時是謂瓦解今關東比年穀不登民多困窮不安其處故易動易動者土崩之勢也故明主之要期在於使天下無土崩之勢而已臨淄人嚴安上書曰今天下奢侈車馬衣裘宮室皆競修飾夫養失而泰樂失而淫禮失而采教失而偽偽采淫泰非範民之道也是以天下逐利無已臣願為民制度以防其淫使富貧不相踰以和其心心和志定則盜賊消刑罰少陰陽和萬物蕃也昔秦北構禍於胡南樹怨於越宿兵於無用之地丁

男被甲丁女轉輸苦不聊生自經於野樹死者相望故
絕世滅祀窮兵之禍也周失之弱秦失之彊不變之患
也此二人同日上書上皆召見謂之曰公等家皆安在
何相見之晚也皆拜郎中而偃一歲四遷至太中大夫
上自即位好士既舉賢良赴闕上書自銜者甚衆其上
第者見尊寵下者賜帛罷若嚴助朱買臣吾丘壽王司
馬相如主父偃徐樂嚴安東方朔枚舉膠倉終軍嚴忌
等皆以材能並在左右每大臣奏事上令助等辨論之

中外相應以義理之文秋九月令民大酺五日

三年春河水徙自頓丘東南入于渤海夏五月封高帝功臣後五人並為列侯河決濮陽汎十六郡發卒十萬救河決起龍淵宮

四年冬十有二月魏其侯竇嬰棄市初嬰之貴重也田蚡常奉事之及嬰廢而蚡甚用事蚡從嬰請田嬰弗與曰老僕雖棄寧可以勢奪乎故太僕潁川灌夫與嬰善亦怒蚡蚡聞之曰蚡事魏其侯無所不可而愛數頃田

且灌夫何與也灌夫家在潁川橫甚蚡乃請案灌夫家
事灌夫亦持蚡陰事賓客和之俱止蚡取燕王女為夫
人太后詔列侯宗室皆當賀嬰過要灌夫欲與夫俱行
夫不欲往嬰曰事已和矣固請與行夫行酒至蚡蚡曰
不得持滿夫怒蚡因嘻笑曰將軍貴人也釋之次至汝
陰侯灌賢程不識方相與耳語未得持酒夫乃發怒罵
賢及程不識蚡謂夫曰程李俱為東西衛尉今衆辱程
將軍獨不為李將軍地乎李將軍者李廣也夫素所敬

也夫曰今日斬頭穿胸何知程李乎座稍稍罷出蚡令騎留夫或按夫頭令謝夫怒不肖謝蚡乃麾騎縛夫召御史曰今日召宗室有詔灌夫罵坐不敬繫居室按其前事遣吏分捕灌夫支屬皆棄市竇嬰欲救灌夫其夫人止之嬰曰終不令灌仲孺死嬰獨生乃避其家竊出上書召見具言灌夫事不足誅上欲赦之蚡固爭之上令兩廷尉辨其事御史大夫韓安國兩順之主爵都尉汲黯是竇嬰內史鄭當時亦是竇嬰而復不堅其辭餘

莫敢對上怒內史曰公平生數言魏其侯武安侯之短
長今日廷論乃局趣效轅下駒吾并斬若屬矣即罷起
太后怒不食曰我在也而人皆籍吾兄弟令我百歲後
皆為魚肉乎上使御史簿責嬰劾繫都司空嬰令兄子
上書幸復召見初景帝時嬰常受遺詔曰事有不便輒
以便宜上書案尚書大行無遺詔詔書獨藏在嬰家丞
相乃奏劾嬰矯先帝令遂棄市而灌氏族矣春三月丞
相田蚡薨蚡疾一身盡痛若有人擊之者呼曰服罪服

欽定四庫全書

前漢紀
卷十一

十四

罪上使見鬼者瞻之曰魏其侯與灌夫共手笞之蚡初折節好士以采名譽每奏事語移日所言輒聽薦人或起家至二千石上曰君除吏盡未吾亦欲除吏其用事如此後甚驕恣嘗請考工地欲以益宅上怒曰何不遂取武庫蚡治宅舍諸甲第田園極膏腴前堂羅鐘鼓立曲旃後室婦女以百數珍物玩好狗馬不可勝數淮南王安來朝蚡以太尉迎安霸上謂安曰上未有太子大王最賢高帝孫如一旦晏駕非大王當立誰哉淮南王

大喜多厚贈蚡至灌夫事上不直蚡以太后故屈及後
聞淮南王事上曰若武安侯在族之矣初魏其侯用事
賓客甚盛後廢棄客皆移於武安侯唯灌夫獨不去初
灌夫父張孟為潁陰侯灌嬰舍人得幸嬰進之至二千
石故冒灌氏姓吳楚反時孟以校尉戰死時夫從軍不
肯隨歸願取吳王若將軍頭以報父讎於是被甲持戟
募軍中壯士所善願從者數十人及出壁門莫敢進獨
兩人及騎奴十餘人馳入吳軍之麾下所殺傷數十人

欽定四庫全書

前漢紀
卷十一

十五

不復得前還獨與一騎歸夫身中大創十餘處幾至於死創少瘳復請行太尉固留之乃止由是勇義聞於天下夏四月隕霜殺草五月地震赦天下丁巳平棘侯薛澤為丞相御史大夫韓安國免秋九月中尉張歐為御史大夫以仁厚見尊重

五年春正月河間王德薨諡獻王德好學修禮樂造次必於儒者道術之士自四方至者皆得古文之書先是來朝上策問三十餘事具推道術而對文約旨明上甚

重之夏發巴蜀民治南夷道南夷道君長有十數夜郎最大其西靡漠之屬以十數靡漠最大自靡漠以北君長以十數邛都最大皆椎髻耕田有邑聚其外西自桐師以東北至葉榆名為雋昆明皆編髮隨畜遷徙無常居無君長地方可數千里自雋以東北君長以十數徙作都最大自作都以東北君長以十數冉駹最大其俗或土著或移徙自冉駹以東北君長以十數白馬最大此皆巴蜀外西南夷也初楚威王使將軍莊蹻循江略

巴黔中以西踰至靡漠地方三百里其旁平地肥饒數
千里既克定之會秦奪楚巴黔中郡道塞不通踰因以
其衆王靡漠變服從其俗秦時嘗通五尺道於此諸國
頗置長吏漢興皆棄之及大行王恢之救越也使番陽
令唐蒙使於南越越食蒙以枸醬蒙問所從來曰從西
北牂牁江江廣數里出鄱禺城下蒙因上書曰南越地
東西皆萬餘里名為外臣實一州主今以長沙豫章往
來水道絕難竊聞夜郎精兵可數十萬若從夜郎浮舩

下牂牁出其不意此制越一奇也可通夜郎道為置吏
上許之乃拜蒙郎中將發巴蜀兵千餘人奉幣帛見夜
郎侯喻以威德為置長吏旁小邑皆貪漢繒帛以為道
遠漢終不能有也故皆且聽命司馬相如亦言西南夷
邛笮可置郡上悅之以相如為郎中將往喻意皆聽命
後西南夷數反發兵興徭役費用甚多相如知其難通
業已建之乃假巴蜀之論以諷上且以宣其使旨於百
姓曰蓋聞天子之於夷狄也其義羈縻勿絕而已今已

罷三郡之士通夜郎之塗三年於茲而功不竟士卒勞
倦萬民不贍今又接之以西夷百姓力屈恐不能卒業
此使者之累也夫邛笮西僰之人與中國不並也其已
久矣仁者不能以德來彊者不能以力并意者殆不可
乎今割齊民以附夷狄弊所恃以事無用鄙人固陋不
識所謂使者荅曰蓋世有非常之人然後有非常之事
有非常之事然後有非常之功非常者固常人之所異
也故曰非常之原黎民懼焉及臻厥功天下晏然也夫

賢君之踐位也豈特委瑣俛促拘文牽俗循誦習傳當
世取悅而已哉將必崇論宏議創業垂統為萬世規故
馳驚於兼容并包而勤思乎參天兩地今封疆之內冠
帶之倫咸獲嘉祉靡有闕遺矣而夷狄殊俗之國遼絕
異黨之地舟車不通人迹罕至政教未加流風猶微內
之則犯義侵禮於邊境外之則邪行橫作放殺其上君
臣易位尊卑失序父兄不辜沖幼奴虜繫縲嗥泣內鄉
而怨曰蓋聞中國至仁德洋恩普品類羣物靡不樂其

所今獨曷為遺忘已舉踵思慕如枯旱之望雨上聖之心又焉能已矣故乃北出師以討彊胡南馳使以誚勁越四面風德二方之君鱗集仰流願得受號者以億計故乃闢沫若徼牂柯饒靈山梁孫原創道德之塗垂仁義之統將博恩廣施遠撫長駕使疏遯不閉習爽闇昧得曜光明偃甲兵於此息攻伐於彼遐邇同體中外提福不亦康乎夫拯民於沈溺奉至尊之休德反衰世之凌遲繼周室之絕業天子之急務也百姓雖勞惡得已

乎方將增泰山之封加梁父之事鳴和鸞而揚雅頌上
咸五帝下登三王觀者未覩旨聽者未聞音猶鷦鷯已
翔於寥廓而羅者猶視於數澤豈不哀哉是時又發卒
萬人治鴈門阻險秋七月大風拔木乙巳皇后陳氏廢
皇后堂邑侯陳午女也午即嬰孫也嬰封堂邑侯午尚
長公主嫖上為太子時長公主有力焉故太后取公主
女配太子及為皇后驕恣擅權寵十餘年無子又挾婦
人媚道故廢時長公主寡居五十餘矣有董偃者年十

三隨其母賣珠於主家主見其姣好因留第中出則執轡入則侍內使散財交士令府中曰董君所散一日金滿百斤帛滿千匹乃白之其後主稱疾疾瘳請上臨之欲因是以見董偃上曰願謁主人公公主脫簪珥徒跣頓首謝因引偃偃著綠幘碧鞵伏殿下上為之起寵遇之自是董偃貴寵聞於天下後上為主置酒宣室使謁者引納董君侍郎東方朔辟戟而前曰董偃有斬罪三安得入乎偃以人臣私侍公主其罪一也敗男女之禮

以傷王制其罪二也偃不遵經學以奢侈徇馬干上之
欲始為淫首其罪三也上默然良久曰吾業以設酒後
而改之朔曰不可夫宣室先帝之正處也非法度之政
不得入也故淫亂之漸其變為篡豎貂為淫而易牙作
患慶父誅而魯國全管蔡戮而周室安上曰善更置酒
北宮引納董君賜朔金三十斤自偃之後諸公主行多
僻恣者矣上妹之子尚上女夷安公主驕放犯罪死左
右為之請上流涕曰廢先帝之法吾何面目入郊廟乎

乃哀不能自勝朔進曰臣聞樂太甚則陽溢悲太甚則陰損聖王為政賞不避仇讎誅不阿親戚陛下行之天下幸甚臣昧死再拜上千萬壽上嘗問朔曰吾欲化天下豈有道乎朔對曰孝文帝自衣弋綈足履革舄集上書囊以為殿帷以道德為麗以仁義為準於是天下昭然大化今陛下崇苑囿起建章左鳳闕右神明號千門萬戶木土衣緹繡犬馬被繡罽宮人簪瑋瑁垂珠璣設戲車教馳逐飾文采鼓竒怪撞千石之鐘擊雷霆之鼓

作俳優舞鄭女上為淫侈如此而欲民不奢佚事之難也陛下誠能用臣朔之計摧甲乙之帳焚之於四達之衢却走馬示不復用則堯舜之隆可與比而治也朔又上書自訟獨不得大官因陳農戰彊國之計數萬言專用商鞅韓非之語文旨放蕩頗復以詼諧終不見用八月螟徵賢良文學上策之曰蓋聞上古至治畫衣冠異章服而民不犯陰陽和風雨時父不哭子兄不哭弟人迹所及跂行喙息咸得其宜今何修而臻此乎仁義禮

智四者之宜安所施設天人之符廢興何如淄川人公
孫弘對曰臣聞厚賞重刑未足以勸善禁非必信而已
矣是故因能而任官則分職治去無用之言則事情得
不作無用之器則賦斂省不奪民時不妨民力則百姓
富有德者進無德者退則朝廷明有功者上無功者下
則羣臣悅罰當罪則姦邪止賞當功則羣下勸凡此八
者治之本也故養民者禁之則不爭治之則不怨有禮
則不暴愛之則親上此有天下之急也罰不違義則民

服而不離和不遠禮則民親而不慢故畫衣冠異章服而民不犯者此道素行也臣聞之氣同則相從聲比則相應人主和德於上則萬類和洽於下故心和則氣和氣和則形和形和則聲和聲和則天地之和應也故曰陰陽和風雨時甘露降五穀登山不童澤不涸嘉禾興朱草生此和之至也故形和則無疾無疾則不夭故父不哭子兄不哭弟遠方民物莫不蒙化此和之極也臣聞之致利除害愛憎無私謂之仁明是非立可否謂之

義進退有度尊卑有分謂之禮擅殺生之柄通壅塞之路謂之權審輕重之數論得失之道使遠近情偽必見於上謂之智術凡此四者治之大用也得其要術則天下安樂法設而不用不得其術則主昏於上官亂於下故天無私親順之則和起逆之則害生此天人之符也時對者百餘人太常奏弘第居下策上擢弘對為第一召八見容貌甚麗拜為博士待詔金馬門弘又上疏曰先世之吏正故其民篤今世之吏邪故其民薄政弊而

不行令倦而不聽使邪吏行弊政用倦令治薄民不可
得而治此政之所以失也臣聞周公旦治天下期年而
變三年而化五年而定唯下之所志上以書荅焉問弘
稱周公之治弘能自視孰與周公賢對曰臣愚淺薄無
敢比於周公雖然愚心曉然見治道之所以然也夫虎
豹牛馬禽獸之不可制者及其教馴服習唯人之從臣
聞揉曲木者不累日銷金石者不累月夫人之於利害
好惡豈比禽獸木石之類哉期年而變臣弘嘗竊遜之

上嘉異其言

前漢紀卷十一